



**Komunikadu Imprensa**  
**09 Abril 2024**

**Informasaun hosi JSMP kona-ba asesu ba justisa ajuda tebes  
komunidade Aldeia Eraulu, Ermera atu kanaliza problema no oinsa halo  
prosesu**

Iha 22 Marsu 2024, JSMP fahe informasaun mós ba autóridade lokál no komunidade sira hosi Aldeia Eraulu, Suku Samalete, Postu Administrativu Railaku, Munisípiu Ermera kona-ba direitu umanu, defínisaun lei, Violénsia Bazeia ba Jéneru (VBJ), dalan atu asesu ba justisa formál no serbisu rede referral ba atendimentu kazu sira VBJ.

Atividade ne'e realiza iha Sede Aldeia Eraulu ho partisipante sira hamutuk ema na'in 29, kompostu hosi fetu 14 (inklui ema ho defisiénsia na'in ida) no mane 15. Partisipante sira ne'e mak hanesan estrutura aldeia, xefe aldeia, xefe juventude fetu no mane, delegadu no delegada, ema ho defisiénsia no komunidade inklui lia-nain.

Objetivu hosi fahe informasaun ne'e mak atu hasa'e koñesimentu lideransa komunitária no membru komunidade sira-nian kona-ba asuntu sira temi iha leten nune'e lideransa komunitária sira no komunidade bele hatene no jere sira nia kazu tuir mekanizmu sira ne'ebé estabelese ona (justisa formál no justisa komunitaria).

“JSMP konsidera informasaun sobre asesu ba justisa formál ne'e importante ba estrutura aldeia no komunidade sira ne'ebé hela iha área rural nune'e sira bele hatene no kompriende lala'ok justisa tuir lei hodi bele fasilita sira bainhira atu trata problema tuir justisa komunitaria no ka kanaliza tuir justisa formál,” dehan Sra. Ana Paula Marçal, Diretora Ezekutiva JSMP.

Iha intervensaun, Xefe Aldeia Eraulu, Sr. Hipolito Oliveira Carvalho hato'o nia agradesimentu ba JSMP ne'ebé realiza atividade ne'e iha sira nia leet no konsidera prezensa JSMP nian ne'e nu'udar oportunidade ida ba komunidade Aldeia Eraulu hodi bele rona informasaun sira kona-ba direitu no asesu ba justisa formál.

Xefe aldeia ne'e mós haktuir katak durante ne'e komunidade aldeia Eraulu iha kazu barak maibé tanba la hatene informasaun no la hatene atu kanaliza entaun sira nonook de'it, maibé ho prezensa JSMP nian, xefe aldeia ne'e fiar katak komunidade sira sei hatene no bele kanaliza sira ninia kazu tuir mekanizmu sira ne'ebé iha ona.

Iha okaziaun hanesan, xefe aldeia ne'e mós rekomeda ba JSMP atu kontinua halo atividade hanesan ba komunidade sira ne'ebé la hetan oportunidade

nune'e komunidadade sira hotu bele iha koñesimentu no bele kanaliza sira nia direitu sira tuir lei.

Iha sesaun ne'e, partisipante sira hato'o sira-nia preokupasaun sira kona-ba testemuña ba kazu violénsia doméstika (VD) hakarak apresenta denúnsia maibé ta'uk kuandu iha futuru sira haree malu ladi'ak no laiha osan atu selu transporte ba-mai tribunál, kestaun kona-ba labarik barak faan sasan iha Díli laran no la eskola no kestaun kona-ba hadau malu rai.

Hatan ba kestaun kona-ba testemuña sira ta'uk apresenta denúnsia, JSMP hatan katak la bele ta'uk atu apresenta denúnsia tanba ho ita nia asaun apresenta denúnsia ita sei salva ita nia maluk sira ne'ebé hetan violénsia iha nia família ka sosiedade no kontribui hakotu korente violénsia iha ita nia sosiedade. Ita mós iha Lei Protesaun ba Testemuña ne'ebé sei asegura ka fó protesau mai ita atu ema seluk labele hatene bainhira ita apresenta denúnsia. Alende ne'e, iha lei ne'e rasik, regula kona-ba Estadu sei fó filafali gastu ne'ebé parte sira uza bainhira kontribui ba iha justisa liuhosi sai testemuña maibé lei ne'e nia implementasaun la la'o di'ak nune'e JSMP hamutuk ho rede serbisu sira tinan barak nia laran no to'o gora kontinua foka no ejize ba iha Governu (MJ) atu implementa lei ne'e ho di'ak nune'e bele asegura, garantia no fó protesau di'ak liután ba iha testemuña ka vítima sira.

Kestaun kona-ba labarik barak mak dadauk ne'e la asesu ba sira nia direitu sira no faan sasan iha Dili laran, JSMP esplika katak ita nia Estadu ratifika Konvensaun Internasionál kona-ba direitu labarik no promulga ona Lei Protesaun ba Labarik no Joven iha Perigu. Lei ida ne'e atu asegura labarik no joven sira iha perigu nia direitu, tanba ne'e ita nia Estadu esforsu hela hodi kria kondisaun ba labarik sira no joven sira atu sira bele asesu ba sira nia direitu sira no lei ne'e mós fó obrigasaun ba família (inan-aman) atu fó kondisaun mínimu no protesau ba nia oan sira.

Kestaun kona-ba rai, JSMP hatan katak tuir lei sidadaun hotu-hotu iha direitu ba propriedade inklui rai maibé ba rai sira ne'ebé ita nian, katak ita hetan liu hosi hola, eransa hosi inan-aman ka doasaun tuir lei, kestaun rai dadauk ne'e kompleksu tanba rai ida dalaruma nia nain ne'e bele to'o ema nain tolu ka hat. Ema balun iha sertifikadu Portuges, ema balun iha sertifikadu Indonézia no ema balun ba okupa tinan barak ona, sira ne'e hotu iha direitu atu reklama maibé kuandu to'o ona iha tribunál deside tuir lei no sei rona parte sira, testemuña, prova dokumentál sira hanesan sertifikadu ida ne'ebé mak vale tuir lei no lójiku.

JSMP mós informa ba komunidadade sira katak knaar prinsipál hosi instituisaun judisiál sira mak atu garantia prosesu justisa ne'ebe justu ba ema hotu iha kualkér kazu sira tantu kazu krime ka kazu sivíl ne'ebé ninia prosesu ba to'o iha tribunál.

Atividade ne'e, realiza hosi JSMP, liuhosi Programa Apoiu Seguransa Komunitáriu (PASK) tanba serbisu hamutuk ho The Asia Foundation (TAF) ne'ebe finansia hosi Embaixada Nova Zelândia iha Timor-Leste.

**Atu hetan informasaun kompleitu, favor kontaktu:**

Ana Paula Marcal

Diretora Ezekutiva JSMP

Diresaun e-mail: [ana@jsmp.tl](mailto:ana@jsmp.tl)

Telefone: (+670) 33238883 | 77040735

Website: <https://jsmp.tl>

[info@jsmp.tl](mailto:info@jsmp.tl)